

quòd cum introitu minorum tui temporis uariantur denominationes per unam differentiam, ita quòd fiet anticipatio per unum locum. Demum adde secunda secundis, minuta minutis, gradus gradibus, signa signis, & si excreuerint fractiones in sexaginta uel ultra, in quolibet genere denominationum aufer sexagenarium, & loco eius adde unitatem fractioni præcedenti uersus sinistram, idq; obseruabis in singulis fractionibus. Cum autem ad gradus peruentum fuerit, si iunctorum numerus graduum, ultra triginta excreuerit, cum triginta gradus signum constituent, pro eis signum signis subscribe, quod si signa facta additione duodecim excefferint, cum duodecim signa integrum Zodiacum perficiant, duodenarium semper abijce, & quod remanserit in signis, gradibus, minutis, & secundis, ostendit tibi æqualem seu mediū motum quæsitum, ad tempus tuum propositum, super meridianum Babenbergensem, diebus æquatis. Exempli gratia: Inquirendus sit mediū motus Solis, Veneris & Mercurij (habent enim hi tres planetæ eundem mediū motum) ad annum Domini Saluatoris nostri Iesu Christi 1521 currentem, ad 16 diem Ianuarij, post meridiem hora secunda, minuta 45, à tempore isto dato subtraham æquationem dierum. Et quia Sol tunc temporis circa sextum Aquarij gradū reperitur, ideo cum tali gradu Aquarij, sexto scilicet, reperi in tabula æquationis dierum unum minutum & 44 secunda, quæ subtraxi à tempore proposito inæquato, & remanserunt dies Ianuarij 16, horæ duæ, minuta 43, post meridiem, tempore uidelicet æquato. Cum tempore hoc æquato, scilicet annis Christi 1520 completis, semper enim fit in tabulas mediū motuum introitus cum annis completis, intraui tabulam mediū motus Solis, sed quia eos annos minimè uno introitu inueni, sed uicinos eis annos, uidelicet 1500, quorum motus mediū est signorū 0, graduum 11, minuti unius, secundorum 13. Hunc igitur subscripsi radici incarnationis Christi, deinde in eodem ordine numerorum, 20 annos completos reperi, residuum scilicet numerum annorum mei propositi, & in directo eorum signi 0, gradus 0, minuta 8, secunda 49 offendi, quæ pari ratione subscripsi priori numero. Intraui etiam cum diebus temporis propositi, scilicet 16, ad tabulam dierum, inueni q; ex eorum directo, signa 0, gradus 15, minuta 46, secunda 13. Deinde quoque cum horis duabus, ex tabula horarum collegi minuta 4, secunda 56. Cum 43, autem minutis horæ reperi minutum unum, secunda 46, ferè. Hos motus subscripsi radici incarnationis Christi in hunc modum.

Radix